

19 MAR 2002  
Mahathir-Poland/I  
DR MAHATHIR DIJADUAL TIBA DI POLAND KHAMIS

WARSAW, 19 Mac (Bernama) -- Ketibaan Datuk Seri Dr Mahathir Mohamad di sini Khamis bakal mencatat sejarah sebagai Perdana Menteri pertama yang melakukan lawatan ke Poland sejak hubungan diplomatik terjalin 30 tahun lepas.

Duta Besar Malaysia ke Poland Datuk Ng Bak Hai pada sidang akhbar yang dihadiri media Malaysia yang akan meliputi lawatan itu, berkata objektif lawatan adalah untuk meneroka ruang bagi mengukuhkan hubungan dua hala.

Katanya, Perdana Menteri akan mengadakan perbincangan dengan rakan sejawatnya Leszek Miller serta mengunjungi Presiden Aleksander Kwasniewski yang melawat Malaysia pada 1999.

Dr Mahathir bersama isteri Datin Seri Dr Siti Hasmah Mohd Ali akan berada di Poland dalam peringkat akhir lawatannya ke tiga buah negara. Beliau yang sekarang berada di Jerman, sebelum ini telah melawat Rusia.

Turut serta dalam rombongan Perdana Menteri ialah Menteri Luar Datuk Seri Syed Hamid Albar, Menteri Perdagangan Antarabangsa dan Industri Datuk Seri Rafidah Aziz, Menteri Pertahanan Datuk Seri Najib Razak dan Ketua Menteri Sarawak Tan Sri Abdul Taib Mahmud.

Dr Mahathir dijadual akan meninjau peralatan ketenteraan dan menyaksikan demonstrasi tentera laut di Gdansk sebelum melawat masjid di Gdansk-Oliwa serta menunaikan fardu Jumaat.

Ng berkata hubungan antara kedua-dua buah negara adalah erat.

"Mereka kagum dengan Perdana Menteri kita terutama dengan corak kepimpinannya dalam mengatasi krisis kewangan dengan cara tersendiri yang tidak konvensional. Ini telah disebut pada sidang parlimen Poland...contoh Malaysia dikagumi oleh mereka," katanya.

Satu rombongan ahli perniagaan Malaysia seramai kira-kira 60 orang akan turut serta untuk meneroka peluang-peluang perniagaan.

-- BERNAMA

AZZ AKT MOZ